

欽定四庫全書

金氏文集

提要


臣等謹案金氏文集二卷宋金君卿撰君卿

字正叔浮梁人江西通志載君卿登慶歷進

士累官知臨川權江西提刑入為度支郎中

洪邁夷堅志載君卿讀書浮梁山一條稱其

策高科歷郡守部使者積代至度支郎中與



通志相合然亦不詳其事迹考曾鞏元豐類
稿有衛尉寺丞致仕金君墓誌銘一篇乃為
卿父溫叟而作稱溫叟四子君著君佐君卿
君佑皆舉進士君卿以皇祐二年官秘書丞
五年官太常博士得以褒崇其親其敘述頗
詳又稱君卿方以材自起於貧賤欲以其所
為為天下慨然有志則其人亦非碌碌者也
宋史藝文志載君卿集十卷江西通志作十

五卷考永樂大典載是集有富臨原序一編
稱臨川江明仲求遺稿編成十五卷號金氏
文集則宋志稱十卷者悞矣原本久佚今掇
拾永樂大典所載僅得十之一二然北宋文
集傳者日稀此本尤世所罕見殘瑤碎璧弥
少弥珍謹以類編次分上下二卷卷集中所
作有文彥博韓琦生日詩范仲淹移鎮杭州
次韻詩和歐陽修潁州西湖及芍藥二詩是

君卿所與遊者皆一代端人正士故詩文皆
清醇雅飭猶有古風陳災事貢舉諸疏剴切
詳明尤為有裨世用又如和介甫寄安豐張
無儀一首即用臨川集中安豐張令修芍陂
之韻而括君卿詩知張字為公儀為李璧注
所未引又和曾子固直言謫官者一首檢元
豐類藁無其原唱知此篇為鞏所自亦均可
互資考証富臨序稱君卿長于易嘗著易說

易箋今並不存獨有傳易之家一篇具載傳
授本未疑即易說前所載之敘錄今既無可
考姑並附於集末焉乾隆五十年四月恭校
上

總纂官臣紀昀臣陸錫熊臣孫士毅

總校官臣陸費墀

原序

金氏文集故尚書度支郎中金公之文也公諱君卿字

正叔少穎悟善屬文康定中文正范公出守鄱陽延致

門館議論縱橫聞望卓著踰冠舉進士登甲科治五經

尤長於易嘗撰易說易箋自謂可以起諸儒之膏肓清

輔嗣之耳目者矣仁宗時公以便親調官江左最為疎

遠屢上封章極言利病即毀其奏藁故今傳者十無一

二也知制誥曾子固嘗誌先府君諫議墓以為公能以

才自起於貧賤欲以所為為天下慨然有志者也至和中公上封事乞建國根本此人所未敢言者公不畏逆鱗之怒而引文景光明故事以言之此足見公之志也公所至之地興修學校教導諸生自公之慨常為詩篇言詞絢美文格清新有韓柳之風焉故所進仁宗輓詞五篇翰苑中編為卷首所作賦詩尤為藻麗文正公嘗榜公賦於郡庠以為格式詳議法律皆主平恕銘誅傳序公正不欺時人稱公有良史之才也神宗更立法度

以底於治故公受命出使皆兼數職奉行制詔綽有條理熙寧中降勅書獎諭曰爾使於遠方盡瘁乃事推我新令為天下先此又足見其匡君澤物之用心也公以憂勤成疾享年不永噫倘使公遭遇其時居鄉相之任則澄清天下未易量也臨川江君明仲學出於公而不忘公善誘之力求公遺稿十得其一編成十五卷號全氏文集以臨嘗參佐於公實知公之所存惠然見借誦讀再四如覩其顏采命筆為序庶幾垂信於後世俾觀

公之文即知公之所存也遠矣公之登科入仕治已化
民備於墓碑今吏部侍郎彭公器資之所作也載於集
後元祐六年五月日序富臨撰

欽定四庫全書

金氏文集卷上

宋蘇金君卿三撰

應天以實不以文賦

推誠應天
豈尚文飾

惟聖作則惟心應天當務實以正本豈尚文而致愆上

順帝心但貴誠而不怠仰承乾造詎飾詐以為先聖人

考古建中握符居上且謂一細民之行當率以正應

上靈之心者固非可忘由是宅大順以昭事盡至誠而
寅亮遣偽之飾惡真之喪天元貴信我乃抱誠一以相
符天道斐忱我乃屏浮華而靡尚諒夫收羣靈之命保
重蓄之資顧洪造之非遠奉一心而敢欺志在順紀動
皆秉彛斥虛誣而自任與精祲以相推念高明之聰早
率由善應即真純而履信安在文為是何天之所應本
於誠民之所順在乎德不可以矜恃干民之譽不可以
罔蔽違天之則所以推以悃悃奉茲欽翼矯枉以歸正

考宜而建極對明威而凝命務達精衷體正觀以宣猷
奚煩末飾得非應之以實者順天理以惟精應之以文
者違天心而足明違之則速彼譴告順之則享夫治平
故我悉道欽承之意都捐矯舉之名至如宋景之言退
星不虛其應西鄰之祭受福蓋主於誠由是慮善乾
飭躬膺、思正直以無貳逞浮夸而失豈期靈既之鑒
祐保珍圖於盛偉簡於上帝貴其約而不貴其華崇彼
令儀從其厚而不從其菲展矣哉恭已臨下畏天作君

顯中孚而上達任至德以升聞稟成湯精一之志體文
王陟降之勤不然安得圓穹助順而應誠翕臻景祐黎
俗承風而化上志弭繁文宜乎前史著之而為規後王
奉之而有證惡文而實以為責任德而妖矣足勝夫然
本誠慤以御邦自協天人之應

惟善能舉類賦

躬秉吉德時惟善人但推賢而是尚故舉類以惟親昭
著徽猷既務援能之理薦伸同志式彰濟美之倫探往

牒之垂言偉哲人之為義軫乎濟俗之念急乃求賢之
利是必舉爾各從其類志非吾黨敢甄拔于昌朝道契
威儀當進揚于顯位諒以懿識旁達純誠內凝察言行
以旌美于朋儕而薦升有滯必進惟賢是稱將大用以
無失致太平而聿興忠美矣初舉解孤之同德智稱鮑
叔知管仲之多能蓋由明哲允昭忠良克闡進其類者
必已之類稱其善者必子之善為乎國紀洞幾先而有
開擢乃邦良由道同而益顯况夫寅奉臣職思隆化基

不進賢曷以贊夫邦治不舉類未足彰乎已知必也務
申援拔罔間謀惟推來歎者漢之巨僚等儕是重知子
產者鄭之良佐朋類能遺彼或伐善自彰蔽賢是務有
柔良不能以顯拔使側陋奚由而善遇茲貽尸祿之誚
曾為匪吉之務誠在招致賢材旌明仕路其達也由乎
德進敢私爵祿之榮其舉也當以彙征孰遠親仇之故
懿審彼德行同吾醜夷詎愛憎之間矣當舉稱以從其
所以子桑顯孟明之賢進非異類文舉薦祿衡之傑道

本相推大哉引重巨才彰明茂緒非其類者貽世之辱
同其榮者得臣之序是故苟非為善之徒曷能明其所
舉

中文辯是非賦

位居尊故
能辯是非

八卦分位六爻遞居惟中正之所據辯是非而匪疎處
內無邪斷二體盛衰之際履尊違吉推三才消長之初
昔之作易也始列三爻重分六位必有主以領其會必
有尊以統其類惟居中也乘剛柔而不私辯于外焉定

吉凶而悉備彼且來助吾惟獨尊位與時至理隨勢敦
進可以察來而彰往退可以推亡而固存統之有宗別
四懼三凶之曠象動乎內識初難上易之原茲蓋寡者
衆之所歸本者枝之所附苟居體以獲用致斷疑而成
務至如乾九據飛龍之位正無常有悔之由坤六履黃
裳之尊示後順先迷之故、知上不曰五上體疇依下
不曰二下體何歸所據所因以無失取物取身而豈非
亦何異太昊司春正四序燠寒之分北辰居極分列星

盈縮之輝是以一陽居陰尊五陰何得而不顯一陰處上
五陽何得而不辯總本末以昭著燭幽明而大闡雜物
撰德觀其變而玩其辭占事知未過乎惡而揚于善况
夫動不可以制動制動者惟靜之所乘外不可以治外
治外者非中而曷能正厥理以無悖歸于尊而足稱聖
人以是揆茲爻變補乎化興宅會要而湊萬方否臧攸
驗握璿玑而觀大運淑慝皆徵用能尾吝首孚自我之
所理腓凶拇悔由吾之所擬稽得喪以斯顯辯安危而

于是故君子樂而玩者文之辭鑿興哀而脩已

大饗不入牲賦

六服將幣一人示恩故臨饗以物備不入牲而禮存歡
然命侑之誠必行諸廟略爾烹宰之事皆止于門聖人
祇講禮經飭修時會加帝罷以勤至示饗儀而甚大謂
上有祖宗之祀宜親割於廟中此惟賓客之來可就烹
於門外觀其繡斧而展驚衣而旒親屈於饗交歡爾侯
司樂升鼎乃進天子重席相酬臣以嚴上而來君亦推

恩弗枉嚴上所以有朝聘推恩所以有燕饗獻皆如命
禮存儻詔之司牲不麗碑儀自割烹之掌噫訓儉者必
曰饗貴誠者必曰牲儻入乃殺因迎宜烹奈何內黷廟
靈之重上召君德之輕牲所以外禮由此成尚鍛修而
飲賓恩足以見缺昭夏而弗奏理從而明無曰於此不
勤在誠弗照而况用以祭器行之祖廟迹君親之意尤
重勉臣子之心可劬躬臨體薦敢忘恭接之勞殺自宗
祊深得制宜之要大抵事合義則損而獲益饗非禮則

親而返疎故我接賓至以優甚較祭儀而畧諸筮彼冠
馬專爾靈著之命止其相者示予交損之初未若几虛
爵盈文昭武察凡敕備物率循大夏宜乎不越振闌之
前牲於此殺

五言古詩

代人送廣州劉待制

元精生俊臣其器疏以博渾玉謝雕鐫古樂鎮浮薄文
章發粹蘊雲漢相紛搏軒昂仕路間獨立羣雞鶴朝端

聳風采衆聽嘉蹇諤緣飾吏事餘中有名教樂按獄祛
煩苛餽糧得豐約邛蜀號險艱靜制猶高鑰歸來奏成
績高議凌霄錫往釐東南計詎足煩精畧中道發詔書
飛榮上天閣抗旌出五嶺廣府開巨幕提封犬牙制被
海珠貝錯况當蠻獠衝尚若蜂蠆蠹日望公之來坐見
起民瘼先聲百粵外猾寇千里却行當靜海隅天步清
且廓樓、外臺吏正因韉鑣縛忻聞大旆過一見如刮
膜下坐聽語言渴引醇酌退嗟蠅虫癡敢議驥尾託

願公南轅還四海霖雨作嘻噓和氣行瞬息羣動躍及
此分寸苗庶幾秋有獲

南野書懷

險途吁可憎淺俗寢澆競進物莫若利趨時不如佞吾
道何由亨讒人方醜正予生與時戾所賦得剛勁力古
恥浮文論經斥非聖勉強悅時事難乎易天性木舌不
卷柔枯株微蔭映泓洄避風波進退觸机穿八載脫流
銓恩與萬家今移官瘴嶺下親闡阻溫清南荒地多暑

嵐氛午猶暝因思古今尹舒慘繫民命士元都下治汲
黯辭以病幾欲慕伊人去就得非輕雖然萬夫長亦足
觀以政升進由漸階困窮亦前定所以勤吏術毆民一
其行澄清疏浚源披攘塞邪徑吏手不得縱奸豪無敢
橫訓染所難入未免加笞榜宿黠殊欲悛良民適相慶
僅憫百里心莫聳四海聽世人重苟且耳目非卓夔庸
免難共議寧與智者爭吐哉蠅蟲癡不喜圭玉瑩爾舌
徒揚箕吾心本如鏡質諸古聖賢周孔與揚孟當時窮

達聞猶不免訛評况於吾徒者得謗適為幸丈夫抱事
業力行以待聘神龍潛於淵不恥羣蛙蠅騏驥繫於野
無嫌困泥濘一旦亨天衢挺身立朝廷禮義張國維威
福尊君柄接武卑夔際致主勛華威名將日月垂功與
天地並彼已烏足論摠懷成笑詠

雙檜分題

名藍壓城闥截炭聳雙檜得地不孤立陵風自相對根
盤乖龍猗葉剪蒼壁碎交柯紐頑銅疊影森翠蓋勁無

絲蘿託直與松栢配爭高丈夫氣恥學兒女態雪霜正
柔落草木任顛沛同心歲寒間正色烟靄外斧斤未翦
拂志節已高邁出羣才可驚有作器必大考室洵棟隆
濟川俟舟載

區著作湘潭舊隱有二亭焉求詩以歸水心亭

危亭揭池心池水清且滑九秋烟霧濃四面芙蓉發此
時浩歌去萬事不掛舌把酒酣清風投竿釣明月

寄題張秀才此君亭

一徑入叢深四軒森翠玉紅塵不到處清秋長在目
主
人厭薄官欲躡高士躅日日念此君招我湘江曲

題胡主簿澄清軒

危壁敞新軒西風滿蘭芷披襟豁萬慮舉日照千里丈
夫固有待澄清不虛紀勾稽職雖賤為仁決由已芳盛
無良苗源汚無潔水願推天下心先從邑中始

過姑孰溪觀李白舊詩洎樂天弔太白墳短句因

而繼和

水從照亭來蕩漾涵秋淨樓臺闕空渺倒影入明鏡溪
山久寂寥勝遊誰與並新月生暮寒謳聲發漁艇

凌歊臺

風流六朝士曾此登高岑太白訪幽蹤飄然成微吟牧
之感遺事名字留碑陰我來徒感慨千載一披襟

汴渠

洪河貫中州隨汴鑿支流涵三萬里來禹浪東南浮糧
道所由濟日逝千斯舟嗟哉隋皇帝禍起江都遊先身

不先民及樂不及憂遠棄宗室重死作社稷羞胡為得
民力舉錡成巨溝後來蒙其利厥功固難酬願思所以
失宴安仍仇讐

慈竹

欲知慈姥心看此瓦上竹四時無改易一節念幽獨
蟠根石罅牢倒影潭心綠直恐霜雪姿化為水蒼玉

哭劉卿材

人皆哭仲途我獨悲卿材仲途與卿材猶賜也與回回

行不可泯孔弦有餘哀卿材不偶聖人孰知賢哉龍馬
駕鼓車不如一駕貽駘燕金正掛賞痛惜骨已埋操舟
過君家登山甫徘徊墓樹忽成拱犯雪色不推攜觴奠
其下灑涕霑蒼苔

丹陽湖

島樹壓叢雲波光鋪塞雪迴浸寒無暑平空曉猶月
呂父已入周范蠡未辭越扁舟誰與同浩歌幾千闋

留題揚子陸清照亭

縣舍敞幽居蕭然敞軒檻高迎遠峯入下與新池闕清
景月生晝寒光冰滿鑑狎鳥自相得輕舸不容泛對此
須澄心宜哉水為鑒

書簡寂觀

欹危煙靄間覆壓山岳半境窮天地寒氣古金碧爛泉
源長清霽雲木杳凌亂尋高下來遠白日已西竄

贈僧惟益

益也非庸僧黃卷粗漁獵身雖闕閭中恥與喧囂接朝

彈側楸局暮杵青黏葉妙理脫高鍵高談騰輔頰緊予

困韉鎖荏苒泐丈牒不見才七年霜髭已盈鑷借問何

所因苦吟詩滿篋

師通禪理兼治儒書高吟彈
奕之暇復精方劑故志道之

歲訖僧靈辯南歸

僧如靈辯者翹枝秀叢林浩蕩遊九州窮奇發清吟巨
軸謁明光朝奏暮拜恩綦袍拂天香珍重如腰銀逸足
不可羈歸雲渺無根清明汴口開一葉東南奔故山盤

冰溪

師之舊刹
前闕水溪

百尺數纖鱗洗耳外名教洒然鷗鷺群

應笑未歸客青衫京洛塵

文相生日

聖賢不世出會合未可知朝廷餘百年天將右重熙經
綸須得人公為生斯時維時秋九月爽氣橫海涯三葉
凋堦賞嘉夢符熊羆豈特鍾嶽靈囊括昂與箕夾山川
之望啓竭敢自私復疑於其來釋老親抱持道貌瑩磁
祿公相乃餘姿勝衣惜寸陰問學俱忘疲過日已解悟
知妙初無師峩冠踐場屋發策趨丹墀儒館聊稅息偉

望臨四陲知公孰能盡荆公每嗟咨謂與公所學展矣
無可疑所憂異世習老不見設施勃興得神考丞弼須
準夔公始在勸誨朝夕輸論思君臣由一德協合踰墳
簞法度日新美小不遺毫釐銜恤俄去位虛佇同調飢
迨歸不閱歲再遷居近司荆公鎮江左成績憂廢隳潤
色固賴可：但如曹隨一朝困儉言補外垂十期眷倚
晚益厚愛立茲可期先帝遣神游登用多非宜恭默久
不言狙詐事謾欺經始稽典墳利澤覃四維反指為虛

政屏棄無孑遺勲舊比共歡東南困流離高懷信安恬
國爾閔盛衰所增在式廓上帝初耆之年來闢四門比
德皆紛披羣才得彙征靈光動晨曦而公屈方面疑歎
均一辭肇此始生日川至來繁禧矧上思肯構繩墨繫
誰尸典策備廣庭三節方星馳歸與廟堂上百辟勞瞻
儀步趨謝几杖康寧見期頤阜俗猶禔身溫飽魚惇嫠
陶冶既禮樂於變無澆漓英聲播金石是皆出人為公
媿自黥劓了不見成虧莊周肆詆訛所以尊仲尼發揮

自公手千載無沈迷邦人申壽祝稚艾肩相隨具幸公
少留此語真愚癡

七言古詩

凡物以怪見憎嫉爾獨胡為人采拂嶢頑累疊百千狀
人獸鬼魅相髣髴裸蠻面縛夷吾因日剝風斂子胥骨
比干愛主心見剖孫子魚人足先剛枯龜灼墨足兆坼
蟄蛇驚春暫蟠屈古器斷爛猶斲雕老木鱗斂半枯朽

僧軒閒殺日月長
斷地擠排破烟鬱
簷溜滴窮蟻子埕
終蔓延引入蝸牛窟
我來不以爾貌取
所愛鏗然最堅
質終當鍛鍊持補
天安此兀々為玩物

清江臺

貢章湍險吁可驚
岸翻石走轟雷霆
崩奔出巔一千里
江勢到此纔淵渟
道山仙府相照映
盤泊下飲蒼龍精
金沙洗淘洲嶼出
紅紫錯雜圍春城
郡臺栽空壓萬瓦
况值開霽宜高明
老郎官冷厭韉鎖
亦有罇酒難獨傾

旋烹茗粥別官佐
明朝又作新昌行

寄題浮梁縣豐樂亭

百流南瀉昌江溥
涵光吐潤生良金
從前良今固無幾
矧復惠政留于今
四十年來耆舊語
李謝劉楊遺愛深
高君氣象又宏遠
能以和易調羣心
政平訟簡日多暇
遠囂凌俗開胷襟
旋治東園敞軒闥
四睇環聳千高岑
已占溪山足清思
更添桃李成穠陰
斯亭不獨與民樂
樂得賢者同登臨
嗟予萬里走燕趙
弱羽歸飛思故林

空吟絕致未能往徒倚南風聊寄音

留題張氏頤文閣

鄱陽才子鍾慶門巍冠大帶何紛々誠心樂道自頤養
霧豹蔚或珍其文朱欄碧瓦江之垠更敞高閣凌烟氛
烟中數岫列牕牖急雨洗出青無痕乍來耳目益開爽
况日文酒酣天真前年詔下起品隱子直奮起軒浮雲
不嫌官小喜及養斂板歸拜高堂親子方歸寧亦同樂
與子登眺開芳樽定交酌壽雖所愧相望蘭桂長清芬

九日過長蘆泊小港留題龍山古寺

輕舟晚過長蘆渡西風吹帆落沙溆空桑古市漁家烟
信步閒尋石城去石城苦遠日苦晚崎嶇半入龍山路
山回路轉翹林處披開白雲見幽寺家菊海榴矜晚芳
落華鳴泉足秋思野叟耕塚出壞石虛城埋狐井射鮒
老僧推門揖我入古碣荒唐草中覩仰天一笑六朝事
過鴈書天作文字

留雲山居呈長老元禪師

衡陽岡阜群龍奔截起萬仞磨天閣宿雲收縱着平地
星長滿軒斗可捫河漢鴻湧巖泉噴六月飛雪冰去木
根下視吳楚區域分衆山培塿鳥足云我來環走竟朝
曛擺脫羶鎖忘塵紛更聞高論益清曠如挹仙袂遊崑
崙
寄題張秀才此君亭
群山四向盤青雲山足一徑縈雲根拂雲截徑敞軒檻
檻外百卉鋪重茵於春哆侈弄顏色散漫紅紫何紛二

主人養高不累俗欲以清節遺子孫翦花芟草植修竹
半卷畫幃含霜筠漸迎風露竟百畝碧油黝地無纖塵
對之氣思自瀟灑行吟足以窮朝曛吾居接境未始到
手馳大筆胡能云勸子無渝歲寒操惟日虚心此此君

范資政移鎮杭州一百韻

聖門高弟游淵源當時所得惟十隲科張言行政與學
魚此四者誰能然公含天資得具美出文入武材謨全
軒昂盛時進以道行高德鉅齊回騫發為文章動驚俗

邈與游夏爭差肩手鑿大竅破混沌分得清濁歸坤乾
斯文去聖日已遠泯塞不絕猶涓涓公恢吾儒獨振起
力引巨海吞百川周旋六經後諸子陟彼太山望八埏
提攜千篇去奏御列宿環拱分經躔章韶夏濩忽冥昧
瓊璫璜圭璧慙雕鐫詞雄語險氣復銳猛將正怒揮戈
鋌群邪衆枉困凌暴辟易萬里窮無邊飛名禁林號獨
步多士仰則猶衡摧惟時朝廷政不一衆口喋喑同寒蟬
公鬱奇材未得吐盤虹積玉胷中填囊書萬言究大政

徑欲鍛石持補天自從諫言扶心胆慷慨大論君之前
采詩上誦閔睢化稽古下陳無逸篇材高於時衆所忌
讒机巧細相包纏如公之言遽見斥嗟々吾道何其遭
上思賈生久不見一日開悟俄詔還歸來復踐諫諍列
正似猛矢加勁弦遂登天閣承顧問凡日三接親遽進
乃眷京畿作大尹有美聞望如庭堅公言臣節矧可奪
寧方而折胡能圓咄哉小人正用事亦以茅茹相引牽
大凡威福自人主其下臣子敢得專設若園林養材木

腐枝朽枿須剝剝方今之患猶大腫未得良藥胡能痊
大書斥言不忌諱貫理若以珠貝穿天子為之徹旒纒
樂以從諫如轉鏃退思謂言即施設返逆衆耳遭呵訐
黃鵠孤飛下太液勢力不勝梟與鳶遭罹網羅不得奮
擺翮垂翅江之壩身雖江湖豈云樂與國憂戚常憤
謂時久安慮必遠往達旦目不眩俄而烽警半夜至
黠羌豕豕窺西偏廟堂奇兵不施設主帥肉食驕且孱
王師之行屢挫血邊邑騷動何喧闐朝廷方議擇儒將

諍臣列奏飛封牋起公于西代天討推轂以送操中權
奉師尊行天子命德望遠振威先零指揮風行紀律定
士卒增氣百十年先期長戈斷爾臂隨以巨杵春其咽
群兇胆落禁不發若卵壓以泰華巔諭之天意使安然
踧踖聞命敢不虔西人父子相得喜咸愈大癘就粥饋
帝曰於予薦太廟拾得巨鼎容牲牲遂以公歸贊大政
思納治道於平公言一物未云獲惴若已推諸淵
觀今正得仲舒策夫欲善治須改弦公孫之才卒克用

救弊一變期暮年國僑首議立諺政習俗未久非所便
初寒暑雨輔天令嗟爾小人猶怨焉甚哉仁義豈迂濶
言未及吐讒人噴邊氓方復思召虎謂以王命來自宣
公揚天休布惠澤一切苛政咸使蠲期民陶然釋重負
時雨驟作蘇枯薦被邊甲士衆千旅又煦鳧藻相依沿
狡免竄縮飛鳥伏良弓收勢藏諸韞時將勞還亟大用
上書願得東南遷帝曰老臣重休息方且畀汝南陽田
南陽之民悅以化焱若暖氣未窮燕隆冬嚴寒雪積苦

赤子乳負蒙裘擅上方南顧孰予濟賴公往鎮蘇民編
江東百城控越絕齊俗輕剽窮奢妍三民勞力事故教
揖：蟻蚋團腥臙望公之來日以治坐使薄惡隨而悛
雖然一方仰其賜安得為惠周幅員吾民控伺豈有識
瞻望德業何奉：淒然末學門下客憶昨捨耕趨士聯
飯蔬飲水亦云樂勉望箕業猶梧棗于時鄴陽被公化
樂以教育為民先公嗟吾儒實已落勉：欲以經義傳
強扶駕駘決遠到足力不騁煩答鞭漸磨師教日已久

有類汙壤遭坯埏良工遇物以規矩方圓大小隨陶甄
鍛磨拂拭僅成器未省所用何如旃逢時清明輒自喜
才卵而翼思翩翹幸歌嘉魚樂賢者數吾不棄鱗與鯁
區々一入太常送誰碩尺蠖猶連蝻退思生成有本末
未能豈敢忘蹄筌公時提師出萬里一伏門下無由緣
皇々寸綠及親養乃以名字歸冬銓度量未免習為吏
束縛日以官事煎方愚動與時事戾進退坎壈誰與憐
男兒三十志未就却碩文字羞丹鉛營々孤飛失所託

恥與燕雀爭連翩願奮羽翰脫榛棘日逐鳳鳥翔飛烟
跋公之門已俯附予子旃旒當風褰十年始得拜車下
若出穢藪遊飛仙公之聲名世軻愈民望其賜猶蹇連
况當景盛天子聖將議明堂張九筵肯如大過棟已撓
方購梁木扶其顛定須籠材器所用鳩斂天下無棄捐
經營架構非一幹願得身備栢與椽公歸輔成此基構
手斡元化隨天旋致君無為坐以治四時成順豈有愆
自然民物日陶遂返我薄俗如羲顓

夜泊竹篠港寄鄱陽朱安石

江陰滄漭雲四垂風蒲雨杜饒秋悲孤檣轉汀落處晚
漁歌傲笑鷓羣疑肥魚新酒且可挹萬緒一破忘者誰
驚波到枕不成夢鴻聲半夜東南飛

和李公素舍人真州通濟亭詩

虹隄崛起開危軒四徹空曠圍山川刺天萬里烟樹外
破浪一去風中船責黃亂眼裂春錦鳴聲聒耳驚秋蟬
亭前深處不百尺神物窟此猶安然

五言律詩

和御製觀龍圖閣三聖御書

累聖傳真蹟天苞炳瑞文珍藏留紫禁寶構拂叢雲焜
耀三辰爛周旋八體分宸心追睿轍尤念保邦勤

送張明遠歸丹陽

此行非遠別何用慘離顏縱棹谿亭外清歌罇酒間相
期在西笑從此望南還歸去重回首夕陽江外山

張子禮鑠應下第南歸

官小事如麻去官書滿車于時不得荐垂翅又還家知
命獨無愧沈英衆所嗟風波信一葉流落向天涯

寄題廣信鄭倅潛道齋

養志浮名外潛神聖壺中誠心如自得樂事固無窮齋
靜橫賓榻詩成促遞筩英瓊何以報惟有四般同

泚山東歸

巨區苦行役今日又東歸攬轡月盈把出林霜滿衣眼
看風葉亂心逐野雲飛稅馬山前驛長天又落暉

寄題畢郎中宅御書閣

帝構籠多士春官喜得人慶氛騰寶札睿睠寵詞臣故
第張層構傳家號絕珍更藏書卷富酣咏樂天鈞

病間偶作

壯矣尚無成區區京國行食貧諳世態卧病見交情萬
事風埃過寸心霜雪明誰知丈夫志日月照功名

靈辯大師歸江南

睿讚釋真筌惟師得本原歌時詩百首祝聖頌千言

注師

御製讚并詩
頌特恩賜紫
巨軸朝聞御方袍
夕拜恩江南歸舊隱高

卧老乾坤大

清風閣

勢壓最高峯
四軒橫斷虹
江山形勝外
疆場畫圖中
景物浩無主
塵襟到即空
何須避炎暑
特地揖清風

七言律詩

霜曉禁寒色
不摧若論花
品是奇材紅
如錦帳香囊綻

黃似霓裳舞
袖開幸與晚
蘭同素景
恥隨籬槿委
輕埃
郡齋得地逢
嘉賞不逐羣
英爛漫裁

題晉无廬先生廟

先生周威王時廬于山之下時人賢之号曰廬君因以名山

山壓重江萬里波
半空精鉄鎖嵯峨
先生死去雲情薄
六國興來佛事多
萬刹金蓮開碧落
一祠茅竹蔽叢蘿
遊人但逐僧歸去
古隱荒涼誰肯過

送廣州劉待制

光搖劍外使星還
天閣平躋侍從班
暫命剖符開廣府

先聲指日定諸蠻浮江大旆翩翩去過嶺新恩次第頒
濟俗有謀方適用卷舒應在笑談間

王玘

閩迴

偶憶去年逃暑飲與君通夕屢忘歸旋沽美酒開樽綠
更買親魚斫鱠肥今日忽驚池水漲小亭依舊柳陰圍
停舟待月波心去攜手相過莫我違

寄題六安縣徐介夫園亭

峨嵋武步對精廬漱玉寒泉灌石渠醅脚滿筍先臘釀

茗叢棲鳩及春鋤清風儔侶簷前竹黃卷生涯架上書

養志待時應自信臨邛人莫謂相如

瑞金縣西池雙蓮汪簿有詩見寄因以和之

惠政多應草木知藕花呈瑞向西池雙紅共蒂初含笑
衆卉千名總合竒寵降帝妃媯泊日恍迷仙珮漢臯時
若教潘令河陽見肯羨東風桃李枝

南塘閒泛

雨收平淀飲殘紅蘋末無風碧印空寒淨渾疑踏冰去

清光直欲貯膏中客檣隱隱逐飛鳥釣舸悠悠任轉蓬

日暮韓隄猶極望却將耕稼問漁翁昔曰田夫今漁翁矣

水鄉真箇似三吳碧淀涵秋水鑑湖十里香風起蓮芰

半空飛雪下鷗雛隄森古木嚴征仗塞繚方田展角圖

閒艤洛陽橋畔飲橋在淀南洛陽隄上雄莫州之中風濤還到此中無

同陳郎中遊南塘

水光烟色滿南塘十里橫連古戰塋千頃芋畦楸罨局

萬章雲木羽林鎗漁歌鬧處菱花紫田婦歸時秫穗黃

賢守公餘行樂去許陪旌騎問耕桑

美周濤權宰大治以湖光亭詩見寄因和之

面揖清光萬頃陂滿簷秋色曙陰微回環遠岫煙中辨

片段閒雲鏡裏飛富治地饒民訟簡洞庭風便客舟稀

知君已厭江山思亭下行吟日望歸

北來寄所知

正色當官取悔尤清時無告獨包羞獄中劍氣猶盤鬱

火裏琴材未見收自古聖賢由直道遭時誣鼓亦幽囚

願持仁義為篙楫，敏手中流救覆舟。

秋鴈

北來南去年，事微物還應不自由。繒繳多机當遠謝，

稻梁已飽更何求。瀟瀟風雨衡陽暮，渺渺烟波震澤秋。

夜過邊城牢閉口，斷腸砧杵不禁愁。

寄別致政王中允

羨君高尚視朝紳，始是人間自在身。深塢結廬窮水石，

半山開徑入松筠。

皆君家之景

有興訪寺常攜鶴，醜酒邀朋

祇墊巾，我欲效尤歸未得。又驅疲馬踏京塵。

鬱孤臺

鱗鱗萬瓦遶雲根，環列諸峯勢獨尊。屹若靈鼈浮海面，

儼如謀將立轅門。贛流東匯龍蛇走，崆阜南來虎豹蹲。

秉月偶為消暑飲，欲捫南斗當清樽。

南康縣消暑臺

子康疎畧人皆笑，即墨孤危衆所攻。遇主卒封齊萬戶，

會時猶位漢三公。二賢養正堪忻暮，百里徒勞且晦蒙。

閒上高臺散幽鬱獨開襟袖挹清風

冬日至冬日代書呈諸兄

人人懽聚慶新陽我獨飛心戀北堂薄宦飄流成底事

數年牢落在他鄉徒將遠意憑歸鴈不及諸兄捧壽觴

何幸前春改官去綵衣相逐戲親傍

寄題三靈山程先生瑞墨閣

翼舒層構倚雲霞日下無雙處士家千疊靈山橫琬琰

八分宸筆動龍蛇趨庭素業皆黃卷

先生子侄皆從學

揭版新

詩半碧紗

聞卿相新詩甚多

我倦迷津欲歸老賴君曾為指仙

槎

滕王閣

無復朱樓暮幕垂碧流清嶂似當時不須越舞并秦唱

自有韓文與杜詩

閣有韓退之文小杜詩

殘雪未消春到晚彩毫

爭落酒行遲滿簾紅日江天暮隔浦一聲揚柳枝

和曾子固聞言事謫官者

四海瘡痍劇蝟毛愛君三諫未能逃所期力濟生民福

不為名存信史褒想見斯人心獨喜願為君黨義尤高

時有願與
免人之語忠言已入身甘竄始見吾徒氣思豪

送慶州知州

所莅驅除弊一新政成草木亦知仁已書治最稱循吏
好躡家聲作諍臣飛詔罷歸漳水日水帆催向汴隄春
未央賜對須南問應記塵勞負弩人

離山陽阻風少憇歸思浩然

雨寒風橫暫停橈楚望亭南十里遙舟刺水村銜燕尾

橋橫煙市隱虹腰歸程不待春潮漲孤憤難憑斗酒銷
幸有同途江外客不吟何以慰無聊

賦得憶梅寄朱公美

七度經春不見梅水邊亭下獨徘徊因思昨夜臘前雪
定是此時花盛開遠信浪從江外至新聲剛向笛中來
如何便得南歸去共把清香醉幾回

和周濤見寄

時知南
康縣

薄宦留連未得歸思親懷舊兩依依
嶺頭梅信憑誰去

枕上鴻聲到此稀
君喜及瓜催北嚮
我嗟垂翅倦南飛
何時共作東都客
不厭京塵化旅衣

和介甫寄安豐張公儀之什

前賢立事豈徒然
惠政須教振古傳
芍水灌餘三萬頃
楚人祠已二千年
近聞令尹開新牖
不避風波上小船
堤築已完輿頌洽
去時民吏重留連

遊陽府寺

山助盤紆一徑斜
水烟深處梵王家
聞雷已薦雞鳴笋

未火先嘗雀舌茶
吟客披雲題石壁
藥僧和露掃松花

四物皆寺中有縱遊向晚尋歸路
渡口平沙卧古槎

蒙詔書獎諭寄呈王介甫相公

鳳口銜書出九重
帝王親賜紫泥封
神光下燭將飛劍
真賞重鳴既啞鐘
砥礪若為酬睿睠
驅馳何敢嘆塵蹤
仙翁更借提攜力
竹杖由來解化龍

重修龍興觀寄呈江吳二尊師

壇宇榛蕪幾十年
遺基重葺控長川
羽人便是雙飛鶴

仙籍須增一洞天
藍嶠逢秋無敗葉
龜池經夏有甘泉
前有山曰藍衝嶺旁有石龜池泉甘宜茶雖大旱不涸
操舟過客宜停棹
暫到塵襟自灑然

萬戶晴嵐生紫烟
絕塵佳致甲昌川
輕舸急漿風中葉
碧瓦朱欄水底天
雨夜龍涎腥柱礎
霜秋桂子落嵒泉
二師自得幽棲趣
向此灰心肯復然

和永叔潁州西湖

名遊無似郡城西
况是棠陰訟簡時
信步桑間春去後

榜舟湖面夜歸遲
烟波際目無窮樂
沙鳥留人逐處隨
應為獨醒須強醉
浩歌風月倒千卮

花沼分題

寒光淨色照花林
更喜詩家共賞心
謝客不成春草夢
杜郎須強海棠吟
惟憂別去歌雲散
不管愁來鬢雪侵
且試主人親酒令
片紅楓琰十分斟

和永叔芍藥

不逐羣花散漫開
風前一笑尚淹回
使人便有留春意

對爾強須御酒杯時與樂并真勝會筆緣情賦盡高才
如何只得新詩看也似南園縱賞來

題贈南臺山院主吉大師

三紀修行箬笠僧布衣襜縷髮鬢色人與卜幽棲處
象法能通最上乘常宿靈岳敲玉磬旋營精刹布金繩
江西望鎮稱臺嶺使者重來喜共登

黃通有詩見寄因以荅之

一別俄然十二春男兒志業可因循簡編少見承平日

世路稀逢磊落人未免驅馳從縣道已甘榮悴任天鈞

惟君知我頃同醉且喜清時祿逮親

與君俱為邑相逢
話舊皆以迎親為

樂

題披雲閣

仕路無如衣綵榮喜聞弦誦日趨庭欲光子道兼三樂
須念家傳重一經已敞高齋臨水鏡更張層構倚山屏
佳名切礪男兒志手扶浮雲見日星

挽仁宗皇帝詞

臣某言大行皇帝好生之德感人至深至於海
隅日出草木蟲魚莫不涵濡膏澤奄棄萬國之
日雖耕夫織婦菑收小兒號咽於道齒于仕者
莫知所報何以為心恭聞昭陵大禮遠日有期
窮邊小臣不得奔詣執紼之列臨紙揮涕撰成
挽詞五首謹隨狀上進西望靈駕無任徬惶殞
廣輪三萬里聲明四海謳歌號太平恭已愛慈同漢景

息民寬厚似周成九郊上帝天和應載饗明堂孝意精
惟有升中獨謙德只應留待嗣君行

優賢從諫致時雍舜日堯眉儼辟容靈箕格天齊睿考
瑞元開笑倍神宗夢迴綵仗歸霓闕愁入宮聲咽暮鐘
臣子訴號空殞血鼎湖無路許攀龍

慈儉身先治道間未嘗論罰不從寬成功日比堯年盛
與子人知夏鼎安憑几遺音傷萬古抱弓銜恨泣千官
昭陵栢老伊川竭宮掖三千淚始乾

深仁體澤決威靈治最橐兵與緩刑坐接迎僚均父子
手揮宸翰走風霆臣心未報空號慕菊收無知亦涕零
視古諸侯從儉約忍思遺詔尚丁寧
億萬民靈四百州銜恩衰暮几時休惜回長夜鈞天夢
歸侍仙都泰帝遊蒼野路遙班竹恨翠微宮冷白楊秋
國人雨泣西郊暮烟慘風悲亦為愁

五言排律

感夢因接夢中所得詩句

我后同堯舜君臣詠載歌天顏春日煦庭列衆星羅雅
奏鈞音合穠香瑞氣和逢辰膺帝睠既醉任顏醜荐嬰
珍蒲異儀庭舞歌多太平無一事圖報願如何

夢賦詩尋得唐韻冊檢看見恩字韻

太平無事日蒲服盡賓門九奏張新樂千官奉至尊光
華逢舜旦膺載誦堯言在沼祥麟萃來庭彩鳳翻需雲
和氣應寶獸異香噴下列容霑醉何從報主恩

和陳屯田秋雨

雨勢正漫空階滴未殘重陰連地暗爽氣逼人寒柱
礎因雲潤池魚得水懽曉畦蔬甲綻夜枕瓦聲乾亂片
飛林籜哀紅泣砌蘭前溪有歸客清思發毫端

太平文相生日

羲御三星次堯莫九葉開霄躔符有道天驥下呈才氣
思凌諸謝淵源過二崔光華逢日月騰躍契雲雷迅步
登文陛嚴聲凜栢臺幽潛均照燭精胆破姦回地重圖
書府人瞻柱石才堂基峻庶陸禹味仰益梅師鉞方謀

却樞庭喜得裴往平蛟穴去還入鳳池來元化經綸內
真儒事業恢威名懾窮裔美利澤枯荑陰德天湏佑精
誠日可迴祥光纔偶聖妖彗不為災全粹圭無玷晶明
斗有魁龍旗聊偃息鴻渚暫徘徊重倚周分陝豐功稷
啟卽國醫先藥石廟酌首樽壘促召君前膝圖勲位正
槐羣情欣愛日愴黨極寒灰王禮修嘗禘天官總貨財
劇民歸砥礪播物就坯胎動植逢時若君臣詠喜哉兩
京繫屏翰大政輟公台上德皆宣布邦經一製裁人和

鳧煦藻兵肅鴈銜枚誕月君恩重娛賓騎從陪寒飈從
激冽喬嶽鎮崔嵬金鑑光長滿霜松勁不摧下寮違几
席並塞走風埃勞瘁魚將涸羈孤雉在罟何當備驅策
猶冀竭駕駘共慶歌巖石無階獻壽杯矧留天曉久行
聽壘書催黼袞榮三入膏霖霈九垓如收東閣士願與
北山萊

真新韓相生日

商飈迎素律允澤薦光精象順奎鉤爛天鍾義氣清千
齡將聖偶冢輔為時生粹蘊森群玉冲襟貯四瀛大方
捐樸斲淳辨復韶黜先帝龍飛日朝陽鳳一鳴振文齊
木鐸保國敵全城舊德方圖任鴻鈞正倚平具瞻歸峻
嶽衆口說和羹固結君臣分窮探禮樂情用人魚畎畝
得士盡豪英省罰蠲茶法均徭審地征鎮浮還美俗恤
隱起疲氓考古淵原博含章氣思宏太平論極至隆典
志興行文物期三代規摹小二京納忠高子孟任重等
阿衡國本重離正身謀一羽輕殊方想風烈皦日照功

名嗣聖嘉深識明神格至誠官儀端表憲圭瑞竦桓楹
邦揆車遵轄時髦鹿在萍戍亭無警燧廊廟有奇兵連
節天顏頌佑真儒道始亨黃裳坤德靜玉鉉鼎功成坐
致唐虞旦前無丙魏聲昌期逢慶誕睿寵極光榮煜
台符應詵喜氣盈南巖同久固西昂共晶明史克歌
眉壽芳風願載賡

五言絕句
宿德興周秀才書閣

十室所可重喜君吾道同因過一攜手醉卧六經中

七言絕句

謝朱公美遺瓜酒

龍蹄甘美蟻頭香遠緘封遣老郎便向崑亭逃暑去
恨無人共把觥觴

雙溪

雙派飛來一境寒合流南注息鷺湍雨餘山脚雲收盡
兩幅青綃繞翠巒

盛暑偶遊曠亭書于再生樟石碣之陰

萬里雄風海嶠來客襟聊為曠亭開千年古木清陰合
若此莊椿是美材

寄別朱公美

三載鄉坊義最親驅車還是走京塵雖無士會無人智

猶有臨岐贈策人

嘗許馬槌
故有是句

石龜塘

石化神龜不計年方塘依舊列寒泉氛埃不到真仙境

擬倩麻姑種碧蓮

南塘

二月江南烟雨多南塘一夜漲春波堤邊遊女最歸晚
爭引漁舟作棹歌

留題分宜前山吳隱士白雲亭

面挹晴光錦繡川卻臨蒼澗玉聲涓逸民自有山中樂
不問山前令尹賢

江上青山山上泉酌泉烹茗白雲間長官不擾民無事

共喜登臨一日閒
不問水江亭分題

雨脚新收晚照開
水心亭上一曾來
紅裙只解邀人醉
競折新荷當酒杯

金沙亭

亭闌方池物物新
花中名品富長春
詩僧用意栽培處
四季常教有主人

五色雀

羅浮山有雀各自為一色
棲于絕頂每遇海風

調順曉日照曜即逐色
以類相從次第羣飛入

於雲中莫知所集俗傳此雀好樂聲
昔南粵尉

作樂于山之上翔集者久之

晨氛澄霽海風調
綵絢珍禽入絳霄
聞說舜庭方作樂

可容飛舞聽簫韶

義鳥

海上有鳥不群飛
亦不常有惟孝義之家或翔

集焉土人謂之義烏

徒知感義海邊州未效精衷已白頭
苑圃清陰無限好棲身容借一枝不

贈南華拱禪師

祖葉彫零四百年法燈今見拱師傳
堂頭海會僧三百畫課蓮經暮叩禪

池亭避暑

新花猶未出圓荷月射風翻卷翠波
對酒強須通夕醉

暑天清景此為多

和張公達端見寄

殷勤寄語張夫子休愛三山勝處遊
聞說詔書催入覲便須飛步上黿頭

和康甫兄見寄

夢想南亭倚翠岑手栽松竹已成陰
白雲不是無留意出得山來四海心

李白墳

謝公山下見孤墳下闕平江萬頃雲盡日艤舟空悵望
謫仙風骨在遺文

偶書芟湖院

波漾晴光入戶庭隔湖煙掃髻螺青老僧猶厭當官道

面壁焚香晝誦經

佛室之陰老僧
終日面壁看經

贈成祕校

四門崑下一翹英滿腹詩書學已成講義群庠初應辟
絳帷羅列盡諸生

病起

黃祖城邊下石船

粵人云舟漿出
瀧謂之下石

蕉林暗地雨如烟只

知問俗求民瘼却愧經旬卧瘴天

金竹峯

重巖崿插晴空雲際叢開菡萏峯疑是葛仙歸洞府

移將江上九芙蓉

大雲倉阻風

走越遊梁萬里回却臨江渡已殘梅歸帆未落青溪尾

雲壓寒風水面來

石

地隘風波勢已驚更容頑險暗中傾自嗟忠信猶防患
却任舟人委曲行

披襟臺

紫微行樂不到處絕勝何人共賞心况是難逢開口笑
強須攜手一披襟

留應聖宮

松掃醮壇青羽蓋杉圍精館碧油幢葛張二老今何許

雲外歸來鶴一雙

宮乃葛張二真人上昇之處

題晞上人齊物堂

莫論西竺與南華了得真筌只一家聲色外來無物我
茫茫名利是空花

題公定兄滴翠亭

數岫翠嵐濃欲滴一軒靜境闐無塵暑風滿枕日高起
誰識羲皇傲世人

真珠亭

新寺回廊入翠微亭前珠樹門芳菲寄言遊者休披採
還似人懷蕙苾歸

總校官檢討 臣 彭元琬

檢討 臣 徐鑑

金氏文集卷上 臣 張謙泰

欽定四庫全書

金氏文集卷下

宋 金君卿撰

表

謝廣東運使表

臣某言伏蒙聖恩授臣前件職任臣已於某月日到本
路南雄州界禮上管勾訖撫俗勸風助農宣化擇才而
授曠職是虞臣某誠惶誠懼頓首竊念臣志業無成樸

忠自許更以外臺之計當其立法之初班布教條蠲除
民瘼朝廷美利夙夜推行敢圖上簡清衷亟遷運使人
皆憫其孤宦猶走窮荒上欲遺之遠民別觀微效此蓋
伏遇皇帝陛下裁成萬世之法獨高三代之英默運神
机畢收羣策丕冒德澤照蕪海隅臣敢不盡瘁公家疲
心疲俗力勉涓塵之補上酬覆幬之仁臣伏限守職在
遠不獲蹈舞玉階臣無任瞻天荷聖激切屏營之至

謝再任廣東運使表

臣某言伏奉聖旨候今任成資日令再任仍升一任者
第頒連最之優重錫遠方之寄荷恩逾厚揣已知榮臣
誠感誠懼頓首頓首竊念臣器業不精技能殊短歷試
駑駘之用莫著於顯能薦膺憲漕之司粗收於薄效敢
圖睿眷特簡主知謂爾遐取或容虛授此蓋伏遇皇帝
陛下恩光日麗澤浸雲遊碩雖兔狗之微亦被蓼蕭之
渥臣敢不欽承皇眷祇守官規益加砥礪之勤上答乾
坤之造伏限職守不獲躬詣闕庭臣無任瞻天望聖激

切屏營之至

江西提刑落權字謝表

臣某言伏蒙聖恩授臣提點本路諸州軍刑獄公事與落權字餘並依舊者在臣子粗脩于職分敢覲褒優蓋君心欲廣於仁恩使之勉激臣誠感誠懼頓首頓首竊念臣濫中科送白首朝行樸誠自照於孤衷勤瘁行周於三紀頃蒙清問誤被聖知俾領使輶詢求民隱雖險艱而弗預惟利病之是圖奏課未優冒榮逾分此蓋伏

遇皇帝陛下神功默運盛德輝光鼎新百為島奕前古立子儔之謗政俗已安行即文王之康功民斯忻戴致天下涵濡於惠澤而仕者傾竭其才能群策盡收微勞必錄臣敢不寅遵聖訓益勵官規紕繩岸獄之繁勸課耕桑之本推行美化上答鴻休臣伏限守職遠方不獲蹈舞天陛無任瞻天荷聖激切屏營之至

狀

仁宗朝言貢舉便宜事奏狀

准勅節文今年貢舉事令尚書禮部貢院依例施行者
臣不避誅罰敢以愚見謹條貢舉事切於時宜較然易
行者有三折於章左伏望聖聽聰俯依加裁擇發於睿斷早
賜施行臣人賤言鄙輕浼宸旒無任俯伏待罪戰汗屏
營之至一事臣伏覩皇祐二年明堂赦書節文貢舉人
曾經先朝省試下特免將來文解如省試不合格者別
具名聞奏臣妄測聖心蓋謂其人嘗蒙先帝樂育之恩
又恤其久於場屋而特加優異也臣竊觀先朝舉人類

多在耆艾氣體衰朽或素無生業迫於貨費而天下州
郡遠者動萬千里夫以貧病衰老至甚之人驟為萬千
里之行則其為勞亦甚矣至如前歲詔下先朝舉人希
覬恩澤望風而至都下者甚衆是時朝廷別無恩旨例
賜錢三千俾為歸計而屬歲癘疫在道或病或死者不
少誠可憫傷今而詔下臣竊思其人力能往者十無三
四其三四中勞其筋力苦於道途不幸而病且死者抑
又可料則是得以名聞者百纔一二耳伏惟陛下躬祀

明堂使民知孝有生之類莫不涵被恩渥故人鼓舞
歌詠喜逢盛明在先朝學校之人蒙陛下預開優恤之
意特異於常今其間力不能往者獨不蒙惠澤之流均
及其身此人可憫也臣今欲望聖慈特詔天下州郡先
朝舉人有願赴省試者聽之其間有貧病衰老就試不
得者委本州郡勘會得解後來但不曾犯真刑者具名
聞奏乞朝廷就賜一上佐之官以畢餘年臣觀此等人
雖材或有短長然自束髮從學至老而志操不變是亦

有意於善也今若朝廷惻然憫其夙心使至暮年終被
恩命少酬願望庶不辜生平嗜學之志上以廣先帝樂
育之恩次以彰陛下優老好善之實而又使天下之人
曉然知為善之利也二事臣聞漢世學者皆以專經補
吏故仕者治身從政罔悖於理當時所得類多有道之
士而後世不克循之故所進之人未有如兩漢之盛也
國家因近代之制用詞科以取士向者有司命題發策
多不專於經典往往雜取諸家小說故朝廷患其如此

亦嘗頒示條約得於國子監經史中出題目近歲以來
遂於注疏及但係監本諸雜文字中摘裂句讀以為題
目况本朝文物浸盛國庠典籍部類實繁學者若專志
於經則不足以備科試將遍而治之則力有所不逮由
是靡然祇務馳騁涉獵破碎文義以絢飾辭章而已
求其內可以美其身外可以謀王體斷國論者蓋幾希
矣凡士之出處語默解能及於古者亦由不專於經術
而然也臣今欲乞申勅內外主司凡試進士詩賦只於

九經正文中出題目其策論亦詳於三史及荀孟揚雄
書中通用如此行之則學者皆務深於經術而有道之
士出矣三事臣竊見向來開封府國子監兩處應舉者
常至數千人其間雖有奇才異士然亦類多託籍冒名
浮薄不逞者雜於其中或紛撓禮闈動致喧爭或輕議
國體妄生謗讟是非雜揉玷我士風朝廷近年亦患其
然故嘗詔立資格許人告訐徒使狡詐之人夤緣為姦
興構獄訟殊虧事體適長澆風以至於引試之際則士

人汹湧謹噪不可止禦至有毆擊吏卒肝腦塗地者况
天府國庠乃朝家觀禮示化之地而萃集浮薄不逞之
徒為弊至此甚可怪也今年自聞詔下四方之往者不
絕於道臣恐前歲之弊未能遽已也竊原士之所以輕
去州郡而樂趨府監者大抵以近年州郡立定解額多
不均一及開封府國子監素無定額比之外郡稍寬故
外郡解額少處競奔湊京師及府監舉人保明行實約
束未盡致有冒名之弊臣今以諸郡應舉人數計之有

十人解一名處有二十人及三十人已上解一名處又
况每歲人數多少不定若只限以舊額實見不均臣今
欲乞申勅開封府國子監及天下州郡例皆以分數取
人二十人中與解一名則不惟取士之均又使人皆樂就
於鄉舉矣其開封府進士須得在京戶稅委實居止去
處不實者論違制之罪雖去官經赦見任官委保不得
原免其衣冠子弟今後就學上庠者須得本貫見任官
與發保明文牒方許入學類試則府監無偽濫之弊矣

仁宗朝言災異事奏狀

臣伏讀六月三十詔書節文以大水為沴應中外臣寮上實封言時政闕失無有所諱遠方小臣不能詳知國體惟陛下赦臣進越之罪留神裁擇幸甚幸甚臣謹按五行傳宗廟廢祭祀則水不潤下伏惟皇帝陛下仁孝之心格於神明時享月薦曾靡有懈咎譴之來不應緣此然臣之愚慮參考經傳殆宗廟主器社稷本根之重陛下或未之思耳竊惟古先聖王雖已大治之後不能

無災異惟恐懼修省思所未至為所未為以應天心則災異自然而消弭臣不敢遠引他說試取兩漢近事以明之若孝景孝成光武孝章之世冬雷霆雨日蝕星殞地震川竭之變而能早定封建固國根本然後災變消伏享國長久陛下睿謀英斷負高前古豈特周旋孝景孝章之間哉然比歲以來日月薄蝕地震河決天之告戒不為不至陛下惻然引咎歸己故嘗避正殿損常膳節服御釋繫囚以圖消伏天鑒不違水沴仍作故臣愚

以為宜詢諸故事思宗廟主器社稷根本之重以為鑒
戒臣又聞漢書五行志曰地上有水比吉性不相害故
曰比樂也而相毀墊淪失比之象又易曰君不密則失
臣不密則失身幾事不密則害成今朝廷大政言未
出口則已喧傳于道上矣願陛下超然遠慮奮乾剛之
斷詔股肱大臣早定封建之議羣小之人無得預聞不
然臣恐陰下相為蠹賊侵陵之禍萌于今日矣詩曰畏
天之威于時保之陛下垂精留意天下幸甚天下幸甚

代人謝王學正狀

竊以憲上帝圖書之府為天子禮樂之司羅獵英豪笙
簧墳典自漢延熹而下迄唐開元以來真主代生譽髦
間出有文德文林之盛森厥羣書有集賢集仙之名號
為清逸逮夫周季草戈鋌之暇聖朝騰日月之光若稽
堯舜之典章沛舉漢唐之風懿得人以富視古為優惟
其賢才任以文事恭以某官發揮靈氣泮渙而有其文
脩飾合儀柔嘉而繼其則非威鳳祥麟之族則叢著朱

草之英瑞我聖辰媿於王國蚤自副宸衷之親透取天
下之顯名官聯廷尉之平任居刺史之責治最歲上詔
言天臨入告大猷不襲小物尚書給札大夫之志可觀
藏室紬書文士之榮固重行見光輝賢業藻潤帝謨反
世俗漓而為醇使斯文粹而不剝天衷是簡民望攸歸
通賀記之未遑俄飛文而先及仰荷一謙之益弥同十
讀之功藏弃為榮錢銘何數

代人謝兩府省主中丞狀

竊念某緒風竒薄器範疏微早逢吉於聖辰偶濫肩于
仕綴甘心冰蘖居懷百謫之虞勉力駕鉉近効一官之
智旋進膺于煩使獲經贊于外司徒施將輓之勞安出
阜民之策殫挈瓶之小智曷濟于遠謀擬畫地之虛聲
已浮于實效敢謂朝言孚允天命渙臨遽加使節之光
華仍領計台之事任循涯溢幸揣已知歸此蓋伏遇某
官獨運鴻鈞導揚和氣旅庭備物細何間于羽皮考室
掄才一無遺于椽桷致茲羣品亦被均恩謹當益勵愚

冥勉圖錙撮上補乾坤之造次酬坯冶之仁

代人謝歐陽龍圖狀

伏念某氣不甚靈智亦非卓竊名卿品之未從事賓進之初仕也未優學其將落徒欲企踵賢人之事業莫知所裁潛心夫子之文章庶幾有立近以被符計漕假道化封殆接浙以及郊願英材而樂育及階與進許侍于坐隅為豆有加飲承于鈞禮屬奔趨于吏後遽邈越于賓榮仍賜誨言以巧朽素拜貶之辱在謙則鳴伏惟坐

崇陰而政成對秋饒而體裕立軻聖哲偕見忌于讒鋒堯舜聰明獨俯回於民聽即膺詔節佇秉國鈞某遠阻師承徒飛鳧黯惟祈為國寶尚以時節宣

代人謝林學士狀

竊惟討六經之大源得五帝之至要作而為事業言而為文章見用于時坐進此道則可以美教化而移風俗安社稷而序民人與之太寧躋此鴻業歷代所以勞于諮訪寵以詳延若崇文麗正之庭天祿石渠之閣在此

選者時惟賢者方今得人鑒古為盛返視皇質追還唐
文不有大方之家曷登華躋之貫恭以某官言辯而古
德萃而新造天人事物之淵知禮樂情文之際飛步亨
衢策名上科秩宗之曠典未脩載繁雅識史氏之遺文
可校雅屬僕才時方圖賢議者悅德某遠蒙庥庇弥聳
翹依不圖損德之愈先俄以長戕而為遺諱觀及再藏
弄為榮仰祈副中外之僉言重起居而享福

謝昭文相公狀

伏念某志雖自勞才實難強若漸鴻之無應未始安棲
同滌井之不汙誰其見惻凄然寒宦蔑爾先游豈有致
身冢宰之尊論道巖廊之暇枉誨函而馳貺被鈞寵以
過優開激塵蒙輝光囊橐黃鐘之應既先于幽潛寶璧
之求可消于災孽此蓋昭文相公協贊勛華之際周回
伊呂之間秉鈞陶民使皆成君子之器詘已待士惟恐
失天下之賢顧雖介善之微亦被一言之賜竊惟疎拙
無補涓埃徒跼厲鈍之心有望伸知之地戴恩之重仰

止高山圖報之誠有如皎日

謝定州部署李防禦狀

伏念凄然寒宦仰止恩閱自遠德輝寔逾弦朏嚮歸寧
于親里承方走于邊亭以于役之憚勞尚未馳于謝懇
敢期鈞矚遠損珍膝仰荷謙光悚銘心蘊恭以某官英
聲颺動盛德日隆朝廷倚重于才謨天下想聞其風采
尚淹俊望出鎮列藩佇膺台節之來別迂齋壇之拜惟
茲孤蹇永誓依歸

謝鈴轄太保狀

伏審榮被宸編總司戎律伏惟慶慰恭以某官壯猷開
濟妙畧淵通屢奏膚功喧聞于聲牘薦膺寵數進重于
事權適脩慶之未違俄飛文而先及悚銘忻抃交集于
中

謝黃河都太李崇班狀

嚮者竊審寵被俞恩就遷要任走空邊而鮮暇馳慶削
以未遑不謂謙光首貽緘褻載惟誠照徒劇心銘恭以

某官沈毅含章端良植操暫領河阿之重佇聞歲最之
成別迂寵光用符瞻頌

謝府界提點趙舍人狀

伏念邈違賢範俄易歲筭不圖譙德之光密損珍滕之
貺喜聞履道無爽天和恭以某官植操端良虛襟澄粹
屢更要任藹著休聲即膺詔訪之俞別迂寵榮之寄更
祈寶輔庸副翹瞻

謝瀛州機宜殊狀

竊伏聲華未親賢範不圖巽德枉被珍滕承受署之云
初惟對時而享福悚銘茲劇忻慕殊深恭以某官逢辰
淑清毓德明茂冠俊遊于茂府允藉才謀馳慶譽于朝
端別迎暉渥敢祈寵衛庸副翹瞻

謝州縣諸官狀

嚮承惠問特荷勤劬裁謝後時悚慚增劇迺惟履道無
爽天和更覲寵珍前迂榮渥

謝信安軍通判馮國博狀

近偶緹輿過從閔壘緒言開激塵懽豁清遽爾違仁俄
而決日豈圖損德之重特枉好音之貽承郡政之優餘
寶哲躬而慶裕忻瞻愧荷交集于中

謝通判職方狀

伏念巖々之表久鬱隄瞻懇々之誠曠焉脩問不圖搗
抑猶賜齒存枉珍襞之見誠若話言之入耳拜貺之辱
真懷敢忘恭以某官量引百川材兼數器遠民蒙福喧
馳敏政之聲清議推高行副急才之詔蕭辰柔落福履

粹和尤覬寵珍以需榮渥

謝瀛州鈐轄禮賓狀

伏審祇膺宸眷榮總戎權伏惟驩慰恭以某官風聲悚
時才智周物素號詩書之將衆推帷幄之謀屢奏膚公
已騰于雋望總司師律允藉于通才果被俞恩寵陞要
任方圖脩慶遽枉飛文悚荷忻瞻牢凝塵懽

謝瀛州王總管狀

竊高盛名殆茲有日欽挹俊表邈焉無階方從事于塞

垣幸蒙庥于戎府敢圖撫抑密損牋封荷隆禮之過勤
鏤塵襟而增愧恭以某官忠貫金石望高嵩衡才出干
人之英名號一時之傑運籌決勝素韜堂上之竒技壺
雅歌自有軍中之樂竹陞邊最別奉恩俞敢覬寵珍用
符瞻頌

謝知原州朱六宅狀

嚮自邊亭之別俄驚歲籥之遷脩問幾稀翹心徒切敢
謂勞謙之德薦貽爻簡之文仰服勤渠第增愧悚恭以

某官忠貫金石名高嵩衡出守名藩茂凝于風績入敷
邊最行被于恩華敢覬珍頤用符欽禱

謝隣近知州狀

蚤遊仕塗素高于碩望竊伏隣壤未覩于光儀矧託蔭
之甚稷第徭風而增慕恭以某官才宏器博義峻仁溫
帝所寵嘉實廟中之寶鎮時方倚重為天下之全城行
奏最于嚴宸別躋際于要任敢私珍寵前迓榮光

代人謝王待制狀

叢爾沈蹤悽然寒宦自竊名于仕級蚤聞誼于朝端况
盛德日隆英聲颺動逢辰結主朝野共高其才謨獎善
育材世人爭識其風采孤危無似忻慕徒深然附驥以
馳無因而致執鞭而事猶謂之榮幸爾實緣適於願望
近獲趨于樂壤得侍謁于精光賁然謙德之鳴煦以善
言之煖寵加鈞盼感極愚衷違離之日未多嚮往之心
已甚

謝曹比部狀

嚮趨樂國獲奉精光遽然而南俄已弥月雖密親于壤
制阻前侍于賓榮恭惟順宅高明招來第祿伏以其官
美化之漸振起於疲氓和風之翔均體于遠俗願惟愚
闇實在恩庥嚮往之心瞻依莫及

謝杜寺丞狀

伏審錫命楓宸躋榮棘寺伏惟懽慶恭以某官政有微
惠行無小疵升聞最績之成俄被懋官之寵庇之大邑
可盡通方先辱飛文豈勝感抱

謝運使王司勳狀

伏念越去恩宇屢更歲筭嬰吏局之阻途上記文而寢
闕敢圖撫抑猶賜齒存飛教見貽悚銘何數恭惟某官
道方器博義峻仁溫超躋郎署之榮歷攬計臺之重足
兵足食密贊于邦經來自來宣一蘇于民瘼佇聞騎台
別迂龍光某遠此庇身無階者侍惟祈上體宸眷寶綬
哲躬

謝知郡狀

伏念近緣吏役之間經從樂壤伏謁賓榮之下密奉愉
顏賁然謙德之鳴煦以善言之暖隆禮斯及寘懷敢忘
逮越去于坐隅早淹移于弦朏欽懷賢範鎮愬翹悚伏
惟某官表峙高岡刃投餘地坐棠陰而玄息順秋饒而
氣寧愈論已同台節非晚願保福履以迎天暉徒誦從
依弗諛誠素

謝隣郡得替知州狀

竊伏隣封獲庇墮人之德遽聞詔節入承天子之光瞻

淑旃之啟行志勞心而如疾不圖吳德密損道函依戀
弥殷悚銘增劇

代人謝知諫院余舍人狀

竊以舜臣九人職惟納言之重周官六太序分司諫之
聯蓋言曠其職則無以襄帝謨諫缺其人則不能聞過
事繁賈是賴監古而然况復惟命是宣將以為天下法
有闕則補然後見忠臣心苟非哲人曷副深簡恭惟某
官量碩而儼德華而溫氣凌虹蜺名動朝野游文經術

之際劇談王教之端入告大猷不襲小務矧主知之固
厚果台節之密頒入對龍光榮陞省署郡望悅德上心
簡能演如絲如綸之言益資遠識領司聰司明之寄仍
藉通才其介守維藩慶聞寵擢大厦成而燕賀實慰于
瞻依雕虎嘯而風生增忻於氣類不圖吳德首陞珍膝
言推實而振浮誠發中而形外敢不拜既永以真懷為
頌之懃遽數奚恚

謝祈州馬侍禁狀

洵違標峙綿易候筭方僚德之增深辱飛文而先及欽
詳婉意弥慰翹誠迩惟釐幹局以優詳總計儲而豐茂
克綏寶履庸迂天光冬序正嚴風期邈阻傾瞻之素宣
繹奚周

代人謝李端明狀

鴻儀清遠久此遐瞻漏驛迂疎曠焉脩問興懷自視覲
目宜多豈圖府政優餘譙光垂照染炙筠之秀牘副刊
琰之新文發自溫誠惠然來及拜嘉已往藏弄為榮恭

以臬官騰日月之貴名抱珪璋之全德朝家寶器儒者
宗英行當天心入副柄用願加重愛少副頌言

謝浮梁知縣狀

久欽蘭芬未親巖峙不圖損德之重先枉置函之音燦
若誠辭藏諸心緒復聆緹軾將戒梓封當拜德之有期
預僚風而增拊方茲炎溽宜在局調延詠所深薄削奚
罄

賀北京賈侍中冬至狀

伏以中孚氣應適膺剛長之辰君子道亨宜饗神明之
祐恭以某官智出物表行為帝師三鎮魏臣久煩於元
老重調商鼎佇快於輿瞻踐履日長之辰涵凝時萬之
福某庇身在遠拜慶無階瞻望台光無任祝頌

賀都運冬至狀

伏以樂準之清聲迎於陽復哲人所履宜樂於天常恭
惟某官文貴天經才周物表按百城之重率蹈於中和
履一陽之辰招徠於第祿佇歸安列以暢遠猷某幸此

棲庥無階拜慶企望威重無任依頌之至

賀屯田都監太保狀

伏審光被宸恩榮膺寵寄伏惟歡慶恭以屯田太保溫
良無玷沈粹有謀密侍黼帷素聞於慶譽出司戎律久
屬於通才矧設險之防邊魚營田之為利雅繫資術以
重事權想已啟途佇諧瞻拜更祈珍毓庸副傾依

代人賀參政侍郎狀

伏審寅奉璽書奮庸鈞席伏惟驩慶國家以四陲不警

百度以脩猶聽輿人之音慮稽和氣之應思得倘弼共
躋泰寧故我勲賢當茲明命恭以某官名重國器身為
儒宗嚴其鋒聳聞於朝采諤而立傾屬於天心自
歸藩翰之隆遂尹王畿之重庶訟時簡昌言日聞有功
在民歸美於上果膺大柄之委入贊鴻鈞之和帝載咸
熙民情胥洽某自惟孱品素荷鈞恩莫伸屢燕之誠徒
切春蟲之躍

賀漕使到任狀

伏審永休中詔主計外臺凡在下風率皆慰望恭以某
官器疏以達行粹而溫精思發於文辭遠致藏乎事業
自擢郎署進揚公庭上聽納於謀謨外頌宣乎命令平
反庶獄威惠協于民中更按列城風聲聳于朝右人皆
悅德上方簡能必將延寘于臣隣方且周旋於事任乃
眷資術實煩漕輸竚見餽千里之糧利不害義變七閩
之俗滴而為淳歸告遠猷遂躋大用

賀唐密學到任狀

伏審總戎專闡布政剛辰凡在下風率皆慰望恭以某
官德均衡石識際天淵漢室優賢素高長孺之直周人
結誦正思山甫之歸暫鎮撫於列城佇入調於元鼎僚
風伊迓拜慶無階瞻望鈞嚴無任悚抃之至

賀饒州知郡駕部到任狀

伏審承華睿檢視政剛辰伏惟懽慶恭以某官逢辰淑
清毓德明茂進揚朝廷練達于政經歷覽郡綱藹聞于
風績乃惟繁劇之地尤藉經通之才佇見政成別膺天

寵某久茲睽阻徒積傾瞻載懷惟梓之恭尤切依仁之
素

賀唐都運轉密學知瀛州狀

伏審進貳樞庭總戎朔部伏惟慶慰恭以某官忠貫金
石望重嵩衡久煩遠馭之才臨按列城之重且喧聞輿
論惟思汲黯之在朝而綏撫我邊尚賴樊侯之將命遽
膺制詔就攬戎權諒席煖之未遑即騎台之來及秉鈞
廊廟蒙福生靈某久被庥光實增欣抃

賀浮梁知縣狀

伏審寵被宸俞榮臨邑政伏惟懽慶恭以某官育德粹
美逢辰淑清馳卓起之清聲富經通之遠術萬夫之長
尚鬱於英才一節以趨佇歸於要列某庇身在遠拜德
末由莫伸維梓之恭徒劇高山之仰

賀謝知郡轉全部狀

伏審進承天寵擢冠郎曹伏惟慶慰恭以某官誠鑒通
微知淵格遠愷：而言行顧彬彬而華實參所蒞有聲

惟帝時簡請而為郡奉條詔以宣和寵以司珍分星躔
而稱重方圖展慶俄枉馳函責若情文謙其撓抑肇此
素律邈馬清輝惟祈上為治朝善綏寶履

賀北京賈侍中狀

伏審祇奉璽書保釐朔部伏惟懽慶恭以某官識貫天
淵之際名動日月之光房元齡善建嘉謀著聞民聽魏
弱翁奉行故事簡在帝心矧經術之宗英邁師臣之密
寵自均勞於藩翰固蒙福於京師望重功勳日隆恩禮

師尹赫々尚紆巖石之瞻民心顯々願蘇霖雨之澤方
圖北顧之重迺眷魏都之雄統制邊州謹嚴宮鑰載煩
碩德表正一方想遺惠之在民不待期而報政佇塞輿
人之望重調元鼎之和某早濫玷於仕巾嘗進瞻於台
座快馳七閩忻慕一心遠從事於窮邊實備恩於鈞冶
南嚮台屏下情無任悚抃之至

賀謝饒州寧先輩狀

伏以先輩越軼珍羣曜明素志詞場得雋固已儒家之

榮祿養逮親尤為人子之慶敬以士鄉之舊賁然謙德
之光慙懃遺書藻絢盈幅拜貶之辱寘懷敢忘想歸侍
於高堂即之官於便郡勉加珍育前迂寵榮

賀知通已下正狀

伏以國頒治象民協宮聲惟墮哲之履端宜神明之來
相恭惟某官行充乎內坐移澆競之風天棊其誠日享
安榮之慶對茲正吉別迂寵光為壽無階僚風徒劇

賀總管防禦移知州狀

伏審承華睿檢換鎮要藩伏惟慶慰恭以某官量引百川身魚數器忠精自任為天下之金城才實相高乃廟中之寶鎮聲猷藉甚恩禮便藩敢望寵珍庸申賀悃

北京文相公問候狀

比者往赴邊亭進趨京國熒煌之座載幸于省瞻鄙吝之心獲成于教育承眷殊厚揣已惟慚遠遠旌旄俄更弦拙望星符而結戀極肺腑以懷歸恭以某官敏德自天與聖為偶百辟維之表憲本朝倚以重輕均勞暫鎮

于兩京蒙福未周于四裔師尹赫々久鬱詩人之瞻民
心顯々願蘇霖雨之澤最然孤進抑記鈞庥敢祈體宸
衷之眷懷寶哲躬之介祉南望台屏下情無任依歸之
至

南京呂諫議問候狀

向者歸省親闡經從畿甸星符有爛幸遂于趨瞻賓豆
載加厚承于顧遇逮違鈞範俄易歲筭思拜德以無階
第馳誠而結戀伏惟履茲韶署紛若龐禧恭以某官逢

辰淑清毓德全粹蹈以中和之域樂然名教之途暫司
宮鑰之嚴藹騰民頌佇陟鼎司之峻以副輿言敢祈體
上倚毗倍加珍寵

張唐公舍人問候狀

嚮者使華脩聘台旆及彊進拜莪之儀飲開豐之
論旋阻違於鈞範已屢換於時弦引企高山勞凝塵懽
恭惟某官全德敏行稱重於臣隣忠規密謀屢裨于袞
闕出分藩闡八代綸言更踐華途藹聞慶譽直節端毅

長孺復見于本朝忠誼開陳不疑有愧于前古矧素高
於士論重固結於天衷行副輿瞻贊襄大政某竊棲邊
壘誓托鈞休敢覬上體眷懷以時珍寵

代人與李防禦問候狀

伏念疎遠之迹特荷顧存塵紛所嬰寔闕脩問矧托恩
輝之茫敢護肺腑之誠伏惟履此初寒萃然休祉恭以
某官世號一時之傑材出千人之英衛社膺公得絳侯
之醇厚端朝清節漸臨玉塞之雄倚若金城之重即膺

迅台歸踐鴻樞惟是沈蹤實係鈞蔭

宣事舍人問候狀

嚮者皇華脩聘使旆及疆幸進拜於溫儀獲飲聞于緒
論仰承鉅庇尤劇中藏旋屬睽違殊深翹企竊惟養谷
之暇日擁天倪之庥恭以某官望重高嵩忠貫白日材
謀開濟克紹於家聲風績藹聞茂膺于天寵蕭辰在序
欽覲未涯敢覬上體眷懷精調福履

歐陽參政侍郎問候狀

伏念某蒙被鈞恩悵遠門墻之久遭迴窮塞俄驚歲月
之遷塵凝向往之心自益困蒙之吝恭惟某官道貫聖
域行為帝師翼大政以同寅表衆明而作憲無一夫之
不獲時方被澤于阿衡未期年而有成議者比材于公
旦美風教而為己任講禮樂而興太平經綸盛時煒燿
前古有若微類亦涵化育之仁則維沈蹤尤恃陶成之
賜某瞻望鈞重下情無任懇頌依歸之至

都運龍圖問候狀

伏念阻進趨于恩館遽回薄于星躔俄聞帝命之俞已
促璽書之台跼轅駒之困躓頓遠鈞庥慕蠅驥之附馳
牢凝塵慙竊惟履蕭辰之向凜整大旆以戒行順序興
居荷天第祿恭以某官智周物表行責天常謀王體之
經通練邊防方之幾務望之雅意方喜于還朝揚綰高
風佇聞于移俗議者悅德上方倚毗藐然孤蹇之蹤仰
止陶成之賜瞻望鈞重無任依歸之至

荆南判府呂侍郎問候狀

伏念違遠門墻淹逾弦朏進侍風誨邈無由緣徒欣慕
于輝光劇牢凝于塵慙伏惟府政優暇哲躬歡康恭以
某官蹈以中和之風怡然名教之樂久繫全德更治要
藩梁園方決于休聲荆渚尚煩于遠鎮周稱山甫切望
于邁歸漢重次公佇聞于大用歲躔回薄台座阻遙敢
祈上為廟朝精調寢饋

代人與轉運問候狀

伏念按封之人久鬱遐瞻更月以還寢疎薄削恭惟某

官布風猷于列屏留意思于本朝均節財賦之餘樂為
名教之地以時慎履介福自天正屬蘭時尚遙巖峙欽
頌之至勿謏于懷

李相公問候狀

伏念台符洵阻弦朏淹移竑茲將輓之勞殆闕置郵之
問伏惟均美鼎味益隆福基恭以某官柱石王家龜著
物表寵居帝戚之右時契夢崑之求精忠所毗羣望攸
悅拜齋壇之命倚重勲賢踐鴻鈞之司協平帝載對茲

炎燠紛若休祺瞻望庥光下情無任激切之至

代與洪州知府少卿問候狀

嚮被魚符獲交郡政以齊舫之過往愧主禮之勿違去
德而來係風第劇迹審涓辰視政宣哲于藩甫覃敷睦
之風以厚剽輕之俗江淮綿邈徒切於翹誠歲月崢嶸
願綏於寶履別迎休寵庸副瞻言

郡牧呂龍圖問候狀

伏審榮歸天闕進侍宸旒密承晝接之餘俾來時萬之

福藐然孤宦仰止恩闕思拜德以無階第僚風而結戀
恭以某官達節廣度洞開照物之誠忠規密謀早著沃
心之效有施為于當代皆輝映于前脩蜀道蒙休再覩
文翁之化南山播詠久紆尹氏之瞻迺瞻勲賢俄頌台
節議當旦暮入秉樞衡同一德以斟元表衆明而作憲
有若微類亦涵鈞仁則維沈蹤尤恃恩署敢祈為宗社
倍保寢興某瞻向台光無任依歸悚激之至

福建提刑郎中問候狀

伏念向者假道淮濱獲覘鴻儀之粹棲身塞北俄驚星
合之遷思拜德以無階第僚風而結戀恭惟某官身兼
數器重引百川自更鎮於劇藩已升聞於茂績迺瞻列
城之重暫煩遠馭之才淑慝旌明羣吏望風而聳動惠
和均著疲民舉俗以蒙休即被俞恩別膺大任竊祈珍
寵庸副瞻言

南劍知州少卿問候狀

竊伏英聲未親粹表第僚風而結想思拜德以無階恭

惟某官逢吉昌辰躋榮膺仕蹈以中和之域恬然名教
之途卿等寵榮雅繫于全德侯藩更鎮方慰于遠民已
聞奏最之成別拜優賚之命敢祈上體眷倚倍保寢興
依頌之誠削劇非盡

代人與王殿丞問候狀

伏念不親緒綸綿易歲時介此近封日聞休譽何主畫
之餘暇枉文滕之見貽仍審局和動皆離祉恭以某官
才猷淵敏志慮直清升祕殿之榮資貳左符之外寄佇

登最績列俟寵靈未卜披從願言慶重

啟

賀韓龍圖轉諫議知瀛州啟

伏審祗膺寵詔進拜崇資伏惟慶慰恭以某官令色令
儀輝光於朝采大言大利密簡於帝心出分連帥之雄
擢冠七臣之重即符公議歸秉國鈞某素荷齒存實增
慶抃瞻望鈞重無任激切之至

落權字謝兩府啟

伏蒙聖恩與落權字仍賜勅書獎諭者外補雖煩尤可
審觀於吏術微勞必錄蓋將勉激于官司公朝推恩能
者知勸如某濫巾仕綴白首郎曹學粗識于古今才未
周于體要偶緣台對悞被聖知愧將命之無堪方及期
而奏課日虞郵罰敢覬褒優此蓋某官身逢千載之隆
量引百川之會謂臬禽之幽遠必應以誠願滌井之潔
清可為之惻俾令寒蹇僥冒恩榮思報未能糜軀徒爾
仰嚮賓閔無任悚荷依歸之至

賀北京賈太師啟

伏以正吉始和適班常於都鄙仁賢胥慶宜獲祐於神
明恭以某官著效真儒助宣元化恊恭一德時方倚重
於阿衡營致太平議者比才於公旦外嚴宮鑰安輯都
城雖兩京舉被於仁風而四海望深於霖雨光齊台極
坐擁春祺佇促璽書重調鼎餗某棲休在遠獻壽無階
瞻望鈞嚴無任依頌之至

賀運使司封啟

伏以某官寵分使節來慰斯民凜然清聲固已風翔於
壤制聞者交抃居嘗日望於輝光時惟獄事之繁遂缺
郵書之獻苛禮之廢明賢所容氣序猶清旬宣多暇伏
惟陰德來輔哲躬安休恭以某官義峻而仁溫行高而
德鉅暫茲外委以暢遠猷餽千里之糧利不害義按百
城之治威以濟寬上方圖賢議者悅德即膺騎台入侍
天光某自視孤危竊祈廕映無階瞻拜惟日傾依

廣東運使到任謝二府啟

竊念某雖自勵材實無他逢辰正喜於有為強力只堪
於俯使矧窮裔漕輸之任湏藉得人而已老病羸之軀
恐難集事擇才而授責任匪輕義不辭難星言攬轡退
循孤蹇但切悚惶此蓋伏遇某官輔成萬世之功亨會
一輪之運仁而庇物器以使人致茲薪楨之微亦預送
掄之末敢不强扶駕蹇永託鈞庥過此以還未知所措

江西運判到任謝兩府啟

奔走江壖敢憚勞役拜伏賓閣邈無由緣竊念某學專

於古而有昧適時義詢於公而不能苟悅冠年得第猥
參英後之躔白首為郎莫伸涓埃之効逢真主非常之
運是賢相有為之秋股肱載膺於明良雨露霑濡於動
植拔茅連茹類以正而不遺鳴鶴在陰聲雖微而必應
致茲庸塞亦被甄收此蓋伏遇某官自誠生通與聲為
偶以益稷之謀致主以立輒之道澤民思澆俗一變於
淳使匹夫皆被其澤有若微類亦滋深仁則維沈蹤永
託鈞底

再任運使謝兩府啟

遠分使指僅書優等之勞恭拜王言仍被再留之命滌
浮外望愧積中懷伏念某學不逮古人之明才不適今
世之用早塵科甲晚因郎曹向辱聖神之誤知薦叨金
穀之煩使按行列壤敢辭頻冒於嵐烟推布新書竊欲
大均於賦後方懼歲成之無狀豈圖天語之有加復委
事權更陞資任此蓋伏遇某官發揮國論裨贊宸謨推
至公以進天下之賢用久次以凝天下之化遂令寒素

亦荷寵光敢不勤服官箴恪脩吏道阜安民俗俾興力
役之歌豐富邦家庶格足兵之治仰酬覆載次答鈞銘
過此以還罔知所措

代賀發運待制啟

伏審詔言來宣已按臨於壤制聞者交抃咸引望於輝
光且慕賢之深殆茲有日雖執鞭而俟猶以為榮况趨
外臺得備下吏鈞廕所及私幸為多恭以某官義峻而
仁溫道方而器博肆醇深之大辯浩乎無窮拯彫弊於

斯文翕然以定爰自擢禁中之清逸騰天下之美名日
親堂陛之隆進陟圖書之奧歸奉大計往安列城屏翰
乎邊陲布宣乎命令含章發於事業決策動手臣鄰上
心圖賢群望悅德方以軍民之本繫乎兵食山澤之利
富於東南暫繫才謨專總事任議當旦暮入贊樞衡某
延政旌麾無任抃頌之至

謝省主判寺內翰啟

海壖持節愧無優課之聞天綽均恩留委外臺之重寵

榮踰分驚悸發中伏念某生遭承平進緣誤透比領按
刑之職就移將漕之司知餘財可以聚人故首農桑之
勸知新法可以惠下故勤夙夜之行盡瘁再期一新庶
務敢謂上聰之過聽特頒宸語以推褒既令治財仍與
陞任此蓋伏遇某官直道佐國公心薦賢處泰之時茅
茹而進居益之世龜朋不遺遂致單干之蹤亦叨倖忝
之命敢不仰遵聖訓俯究民情講求山澤之利源圖足
朝廷之財用少凝績効庶答恩私卑情無任感荷激切

之至

記

忠義堂記

嘉祐六年趙侯子深被命守雄明年政成始新廳宇之
北開軒曰曰端正又從而立堂揭之曰忠義據近古
端莊忠義之士書其名氏與其行事焉若漢之大賢人
如董賈楊雄名將相如蕭曹吳鄧輩功勳德業焜耀竹
帛又豈徒一節行而已哉今取其迹之尤著者列焉有

致位卿相者有立功將帥者任師傳者將王命者宗室
戚里之賢者定禍亂者死國事者達權救弊者執經守
道者進懼其險者不復備舉上自周秦下迄五代若此
逸者貴繁其人今所錄者惟漢唐可其壁用四十有二
人聊以備閒燕之觀思其人見其所履雖愚者勉之亦
足以發其志矧才者乎余嘗聞王安漢雖苦多務而日
尋記傳張校尉雖號雄猛而愛尚君子登征虜之悅禮
樂張度遠之喜講論皆周旋軍中然有好事如此趙侯

雅意樂逢治平公之暇委蛇庭戶間日翫古人之名節
有足開益宜無愧於前所謂諸將軍也嘉祐八年四月
一日記

誌銘

吳司封墓誌銘

公諱仲字仲舉世居鄱陽太伯之南吳為著姓芮起鄱
君五世為諸侯王至大司馬漢七世孫延之亦嘗為鄱
君令公蓋其後也曾祖漢琛祖承諭皆不仕父紹文累

贈光祿卿母葛氏贈丹縣太君妻范氏封南康縣君先
公而亡有子男二人長良嗣天資孝謹公初為郎時以
祿饗恩例得奏補次良輔纔十歲用公遺表恩今皆為
太廟齋郎女六人長適進士徐庚次適國子博士尹忠
恕次適渠江縣令王倚次適祕書丞張奕次適潭州觀
察推官李師旬季尚幼公力學自奮天聖初擢進士第
補廬陵獄官餘杭法掾遷歙州軍事判官荆南節度掌
書記用舉者改著作佐郎歷建昌依政二縣宰益州路

轉運使舉辟成都監推以歲課增羨除湖州通判代還
推知祥符縣秩滿出守安州尋授荆湖北路提點刑獄
公事未幾乞郡移守四明政成歸覲朝廷優老得宣城
郡繇著作凡九遷至司封郎中公素其分以恭儉自處
雖卮酒杯曩怡：如也當官廉畏審持文法濟以恕故
吏無敢竊舞而民亦不忍欺南安太守既病且老以賊
抵吏逮及者三數百人留獄未決詔制命公往覈其事
至則悉與釋縛待之以不忍之情即日獄成祥符赤縣

民訟紛夥雖得廉吏不為貴勢所移者幾希公恂恂自
守不容有私謁而政號平簡四明並海之田水利可及
而民力所不堪公與為之堤堰石硤凡百所墾闢滋廣
民實利之公厯官四十二年無小過失所舉吏几百員
亦無以事廢者故樞密使田公况實惟名臣今延帥程
公戡丞相曾公公亮文公彥博國之元老皆嘗褒薦士
以是益重之公惟嗜經史藏書踰萬帙多自讐對雖年
踰耳順手不釋卷治平元年冬公既得宣守以歸至于

儀真謂其家人曰吾奉職厘事不愧為良吏少小時力
家事勉就學亦不敢自期今日若得歸拜松楸然後請
老琴棋自適以畢天年不已樂乎顧桑榆晚景惟恐未
如所欲爾左右愕然不意此言曷為而發也數日遂感
疾復謂其子曰此吾亡所無以藥瞑眩我為汝克家吾
死如甘寢矣十二月二十五日丙戌易箚於舟中享年
七十三子良嗣護旅襯歸于故第明年十一月初四日
庚申安葬于芝山西南之隅里人金某勤良嗣之請為

之銘云公于居鄉孝友柔克起家即為稽古之力初補
理官獄有陰德作令畿赤自公退食將命荆南無曠厥
職守安與明暹勉勤績庶足自將志無不得生營所陌
手植松柏既壽而歸夫復何戚有子其承請銘其石

程府君墓誌銘

府君諱某字某休甫之後也曾祖某不仕家于歙乾符
中徙馮遂為新昌人也君質直善治生自奉以薄而泰
然若有餘以誠接物故人亦莫不誠里之人貸而不能

償必折券而使之去邑之汙吏有利其賄者以事動之
雖屢至公府不屈竟遭郵罰之辱嘗憩門庭間見籠翠
碧禽者贖而縱之君卒之日翠來入其堂翔集于柩之
上跂然而鳴若欲見而不可得如是者累日人皆異之
誠心所交乃能格物非信厚而何始娶王氏前亡繼室
滕氏長曰某應進士舉曰某曰某方在幼學嘉祐四年
秋君以疾終享年六十七明年庚子某月日葬于某鄉
之某山葬之前其子某造吾門謂吾曰嘗聞之聖人不

輕十室今夫淺俗惟耳目所習是非莫定非得世之所
謂賢人者一言將焉取信於後某幸從學周旋鄉土間
恨不得為公之御有年矣重以先子宮贊府君有一日之
舊公其為我銘之吾固辭不獲勉而書云彼酣而蒙群
聚於室同則拂經異則罹疾審擇其宜惟履之吉利誘
于中汨爾常性勉之就約或幾於正誠以固之乃終有

慶

雜著

傳易之家

魯商瞿受易於仲尼仲尼卒商瞿授楚馯臂子弓

一云子弘

子弓授江東橋庇子庸

一云魯橋庇子庸

子庸授燕周豎子家

一云周醜子家

子家授淳于光羽子乘

一云東武孫虞子乘

子乘授齊田

何子莊及秦焚書以易為卜筮之書獨得不焚故傳授

不絕漢興田何授東武王同子中

讀曰仲

洛陽周王孫丁

寬子襄齊服光四人為皆著易傳

丁寬作易說八篇三萬言訓詁奉大義而

已王周服皆作易傳二篇

周王孫授魏蔡公

蔡公易傳二篇

王同授齊即墨

成廣川孟但魯周霸莒衡胡臨淄主父偃菑川楊何叔

元叔元易傳二篇叔元傳燕韓嬰河內司馬談大中大夫京房

非焦延壽弟後丁寬復從周王孫受古義號周氏傳然

周王孫即寬師田何之學也寬授同郡田王孫王孫授

沛施讐子卿一云長卿蘭陵孟善長卿瑯琊梁丘賀長翁繇

是有施孟梁丘之學焉施孟梁丘氏章句各二篇施氏授河內張禹

子文瑯琊魯伯禹授淮陽彭宣沛戴崇子平魯伯授秦

山毛莫如少路瑯琊邴丹曼容繇是施家有張彭之學

孟氏則改師法以候陰陽災變書詐言得自師田生而

同門梁丘賀証明之且非田生之法也授同郡白光少

子沛翟牧子况由是孟家有翟牧白生之學梁丘氏者

始授大中大夫京房易房出為齊郡太守後更事田王

孫然則京房田王孫皆田何家法也漢宣帝時聞京房

為易明求其門人得賀、年老授于子臨、始從父學

亦嘗事施讐後卒行京房法授五鹿充宗君孟君孟畧說三篇

君孟授平陵士孫張仲方沛鄧彭祖子夏齊衡咸長賓

繇是梁丘家有士孫鄧衡之學今子夏傳即鄧子夏蓋
出於梁丘家也其後又有京房易

房字君明東郡頓丘人非大中大夫京房

也房始受業梁焦贛延壽贛云常從孟喜問易會喜卒

房以延壽易即孟氏學時孟氏門人翟牧白生皆曰非
孟氏法也房後以災異得幸授東海殷嘉河東姚平河
南乘弘皆為博士由是有京氏之學焉又其後有東萊

費氏易

名直字長翁

其學無章句本以古字號古文易以彖

象繫辭文言解說上下經授瑯琊王漢平仲由是世傳

費氏之學又沛人高相與費公同時亦無章句自言出
於丁將軍傳授子康及蘭陵毋將永由是有高氏之學
焉漢宣帝時施孟梁丘皆立博士至元帝世立京氏易
惟費高二家未得列於學官成帝時劉向校書考易說
以諸易家說皆祖田何楊叔元丁將軍大意畧同惟京
氏為異向以中古文易經校施孟梁丘經或脫去元咎
悔亡惟費氏經與古文同然授其學者未盛于世時梁
丘賀以下筮得幸宣帝及至顯官故學者宗焉其後五

鹿充宗貴幸善梁丘易元帝好之欲考其異同令充宗
與諸易家論充宗乘貴辨口諸儒莫能與抗皆稱疾不
敢會又施讐之門人張禹以經術為成帝師位丞相封
侯成就弟子尤著者彭宣戴崇皆至公卿故施氏梁丘
之學尤盛于當世以至孟氏京氏弟子俱為博士故二
家之學亦行焉高相子康為王莽所殺故學者衰廢而
費氏獨行古文易然而未得立者蓋亦不幸者矣其後
東漢諸儒習施氏者則有沛戴崇洎子賓陳留劉昆威

公洎子軼君文習孟氏者則有南陽注音圭丹子玉中山

鮭陽鴻孟孫

鮭胡佳反又苦圭反一作鮭胡瓦反者非

廣漢任安定祖習梁

丘氏者則代郡范升辨卿京兆楊政子行

一云范升楊政皆傳孟氏

易者穎川張興君上洎子鮪惟張興最知名為梁丘家

宗弟子自遠方至者著錄且萬人焉習京氏者則汝南
戴憑次仲南陽魏滿叔牙濟陰孫期中或惟高氏之學
無傳焉建武中陳元長孫鄭眾仲師皆傳費氏易其後
馬融荀爽亦為之傳自是費氏興而諸家之學衰矣陳

荀馬皆當世大儒故費氏之學益盛今輔嗣之學蓋出於費氏古文易也再原漢之言易者一出於田何其傳者若周王孫同揚何大中大夫京房丁寬田王孫皆本師法然當高惠文景之時學其未興也至宣元間施孟梁丘京氏四家及高相之學多以陰陽災異為說惟費氏本以古字號古文易以彖象文言講說上下經為有本末又校之諸家獨與中古文易同流及馬鄭等家其學遂盛獨輔嗣天啟其衷而入聖門之奧考淵其源雖

本于馬鄭之學然其流溥博出于諸家遠矣噫易之大原皎若白日函光于犧旭于文迄我聖師而後正中焉映于秦薄蝕于漢諸家之說禁焉而聖道微矣輔嗣特起斥去異端天人之道俄然而明然猶時若氛翳未能廓然若將有以待焉爾在其賢者心聖人之心猶得觀望其光景者哉重卦之人孔穎達曰重卦之人凡有四說王輔嗣以為伏犧鄭康成之徒以為神農孫盛以為夏禹史遷等以為文王其言夏禹及文王重卦者按繫

辭神農之時已有蓋取諸益與噬嗑以此論之不攻自
破其言神農重卦亦未為得今以諸文驗之案說卦云
昔者聖人之作易也幽贊於神明而生著凡言作者創
造之謂神農已後便是述脩不可謂之作也則幽贊用
著謂伏犧矣又引下繫云上古結繩而治後世聖人易
之以書契蓋取諸夬既象夬卦而造書契伏犧有書契
則有夬矣故今輔嗣以伏犧既畫八卦即自重為六十
四為得其實君卿謹按揚雄作解難其辭曰伏犧之作

易也綿絡天地經以八卦文王附六爻孔子錯其象而
彖其辭然後發天地之藏定萬物之基又法言述文王
之淵懿曰重易六爻不亦淵乎司馬遷云伏犧至純厚
作易八卦又云西伯其囚羑里蓋易之八卦為六十四
班固亦云商周之際紂在上位逆天暴物文王以諸侯
順命而行道天人之占可得而效於是重易六爻作上
下篇孔安國云伏犧氏之王天下也始畫八卦又繫辭
辭云包犧氏之王天下也始作八卦以通神明之德此

經據灼然矣輔嗣獨擯諸家之說孔穎達從而解之殊不達繫辭之大義妄引益取諸益之說惑之甚矣夫易曰天地設位易行乎其中矣則是兩儀定位雖未有易之書而易之道已著矣若文王之前雖卦象未備列而古先聖人順天地之道與物之宜以垂立教而得乎易之道與卦義相契合者固已多矣豈順先觀卦象而後有為乎原繫辭之意蓋謂若神農為耒耜得易益卦之義若黃帝為弧矢得易睽卦之象也如曰不然且繫辭

云上古結繩而治後世聖人易之以書契蓋取諸夬夬書契之作始于伏犧如穎達之見則是未有書契之時已先有此夬卦後因觀象而作為書契何不思之甚也又穎達既以文王為卦辭周公為爻辭為然如曰伏犧之時已重卦則是但有六十四卦之名卒無一言以明卦義安所謂垂世立教哉穎達又以說卦有作易重之文謂非伏犧不得云作易且伏犧畫八卦至於文王重之而易道始成故曰易之興也其於中古乎作易者其

有憂患乎又曰易之興也其當商之末周之盛德耶當
文王與紂之事邪此其文王作易之明驗豈得謂非伏
犧不得云作也君卿以為伏犧畫八卦文王重而為六
十四復繫之卦辭周公述文王之志又繫之爻辭仲尼
贊而為彖象文言為得其實兩漢大儒揚雄司馬遷孔
安國班固據繫辭伏犧始作八卦之文斷然無疑矣

總校官檢討臣彭元琬

檢討臣徐鑑

校對監生臣張謙泰

全氏文集卷下